

TAIORAA : 1 TORINETIA 1/26-31  
 IRAVA POROI : 1 TORINETIA : 26

**“TE ITE RA HOI OUTOU, E AU MAU TAEAE, I TO OUTOU PARAURAAHIA, E AITA REA E TAATA PAARI I TE HAAPAORAA I TE TINO NEI, AITA REA E TAATA MANA, AITA REA E TAATA TEITEI FANAUHIA”.**

TORINETIA : E òire tuiroo teie no te mau fare Haapiiraa teitei. Tei roto atoà i taua huru òire ra, te mau òrometua haapii e parau puite teitei roa ta ratou, e mau òrometua àravahi e te ite i te haapii i te taata e rave rahi. Teie huru òire, e òire tapapa-roa-hia o na e te mau taata e rave rahi e hinaaro ra i te titau i te mau ite hau atu. Na roto i teie huru oraraa i roto ia Torinetia, ua riro o na ei òire faatianiraa no te pae no te ite., te maramarama, te paari, te mana, te teitei no te faito haapiiraa, i faa-hinaarorahi-hia ai o na e te mau taata o te ao. E òhipa maitai roa te titauraa i te paari, te ite e te vai atu ra, ei maitai no te taata, teie ra, na roto i te rahi e te rau o te taata e tapapa ra i taua òire ra, ua haamata atoà te nunaa o Torinetia i te tui i te huru o to na oraraa Ua haamata o na i te tipae haere i te oraraa o te tahi atu mau nunaa. E no te ite e te paari i noaa i taua mau taata ra i òhie roa atu ai te tauraa.

E hoa ino ma e, i MAOHI NUI nei, te reira atoà te òhipa e tupu nei. Ua riro o maohi nui ei fenua faahinaaro-rahi-hia e te mau taata no rapae mai. Haere mai nei te Evaneria e te iho tumu Ati-luta, pee atu ra tatou, eiaha i te Evaneria, i te faanahoraa ra a te Ati-luta. Haere mai nei te papaà, pee atu ra tatou i te iho tumu papaà, haapae atu ra i to tatou iho e to tatou hiroà. Teie a te nunaa Tapœne e haere mai nei, a rave tatou a pee i to na huru oraraa e ta na mau faarapuraa, moè roa atu ai ta tatou e to tatou. E òhipa maitai roa te fariiraa ratere, e farii ra ia oe iho na mua roa, i reira e tià ai ia òe i te farii i te tahi io òe iho.



**"Te Atua te Fatu o te paari, te mana e te ite..."**

E hoa ino ma e, oia mau, te tahe pape nei to tatou mau fenua i te hoohia i te mau taata rapae, te riro pape puè nei to tatou nunaa ia vetahi è, to na reo, ta na peu e te maa, te mouà e te tai e te taata atoà. Teie te auraa: aita e mea e mau i mua i to vera mana, to vera ite, ta vera moni, to vera puai e ta vera faananeraa. Te tapapa- oioi-hia mai nei ito tatou huru here matapœ, mai tei tapapahia i roto i te òire no Torinetia. Auè ia tatou e.....

Aita reà taata paari, aita reà taata mana, aita reà taata teitei.

E aha te auraa? Te haapii ra te mau òrometua i te tumu parau tei hau atu i te maitai e te faahiahia. Te haapii atoà nei to tatou taeae iti o Pauro i te tumu haapiiraa no te TATAURO O TE METIA i te taata no teie òire no Torinetia. E aha te tuàtiraa no teie parau tumu e te parau ta Pauro e haapii nei Noa atu e òire tuiroo o Torinetia no



**"Te taata tona ite, te taata na horeà..."**

te pae Fare Haapiiraa Teitei, e maitai rahi to te mau òrometua haapii, te parau nei Pauro e, aita reà taata paari. Noa atu te paari e noaa mai i te taata, aita reà taata mana. Noa atu te mana e noaa i to ratou àravahi, aita reà taata teitei. Noa atu e noa te mau parau puite teitei, aita reà ratou. **Aita reà**, teie te auraa, te vai ra ihoa, aita ra i rahi, e mea iti roa ratou. Oia hoì, tera te manaò e, ua noaa ia ratou te mana, te paari, te teitei, na te haèhaa ratou i faaiti. Oia mau, ua maiti te Atua i te mau mea haèhaa ei faahaamaraa atu i te feia tei noaa te teitei. Maiti te Atua i te mau mea paruparu ei haamaamaaraa atu i te feia tei noaa te paari e te ite. Maiti



te Atua i te mau mea tauà-òre-hia ei haavahavaharaa atu i te feia tei noaa te mana. Teie te auraa, ia hinaaro noa atu òe i te paari, te mana e te teitei, haere i raro na roto i te faahaèhaaraa, i reira e noaa ai teie mau mea. Te tahi atoà manaò, eiaha ia moehia i te taata e, no ô mai teie mau mea atoà i te Atua ra, O na te Fatu o te paari, te mana, e te ite. Te haapii ra Pauro i te Tatauro o te Metia. Ua haamaamaahia O na, ua faaòohia O na, ua vahavahahia o na, no to te taata maramarama, no to na paari. E parau ihoa ratou e, teie tumu haapiiraa ta Pauro, e haapiraa ia na te mau tamarii àruàru aita a i ite te parau. E hoema e, haamanaò na i te mahana Penetetote, e aha te parau i faaroohia ? ua taèro te mau pipi i te uaina. A hiò na i te feia ra e parau hanoa ra i te parau mai te maamaa ra te huru.....e 5000 taata tei papetitohia. Eita e òre te hiò-noa-hia mai ra tatou e te mau faaroo èè. Eita e òre e te hiò-noa-hia mai ra tatou e te feia e parau puite teitei ta ratou. I te taima a papetitohia ai ta tatou mau tamarii, i te

taima a haapapuhia ai tatou, te vai atoà ra paha ta ratou mau faaooraa, te mau faainoraa, te mau vahavaharaa. O vai hoì i ite. Eita ra e òre e te vai ra.

Hoè noa mea e noaa ai ia tatou te paari, te mana e te teitei, ia haèhaa tatou e tià ai ia hoì roa tatou i raro. Mea na roto mai hoì te Fatu i te hoè nunaa haèhaa roa, hoè nunaa paruparu i te faraa mai i roto i teie ao. Eiaha atoà ia moèhia ia tatou e, no ô mai te paari, te mana, e te teitei i te Atua ra, eere ra no te maitai o te mau fare haapiiraa e te àravihi o te mau òrometua. No ô mai ra i te Fatu ra, e ia haèhaa e itehia ai teie mau horoà i roto ia tatou.

AMENE

Antonio TEMAURIORAA Or.  
Maharepa 28.01.90

**on fait de la tôle!**

**Ondulées ou nervurées  
galvanisées ou prélaquées...**

Nous fabriquons toutes les tôles sur  
mesure en 50/100 - 63/100 - 75/100  
qualité, COLORSTEEL - PLASTISOL.

Prix défiant toute concurrence!  
Tél. 42.83.49 ( 3 lignes groupées )

**GUILLOUX**